



Халқ сўзи

Ўзбекистон –
келажаги
буюк
давлат

1991 йил 1 январдан чиқа бошлаган

WWW.XS.UZ

E-mail: Info@xs.uz

2018 йил 20 июнь, № 124 (7082)

Чоршанба

Сайтимизга ўтиш учун QR-кодни телефонингиз орқали сканер қилинг.



Ўзбекистон Республикаси Президентининг ҚАРОРИ ТОШКЕНТ ШАҲРИДА ЖАМОАТ ТАРТИБНИ ТАЪМИНЛАШ, ҲУҚУҚБУЗАРЛИКЛАР ПРОФИЛАКТИКАСИ ВА ЖИНОЯТЧИЛИККА ҚАРШИ КУРАШИШ САМАРАДОРЛИГИНИ ОШИРИШ БЎЙИЧА КЎШИМЧА ЧОРА-ТАДБИРЛАР ТЎҒРИСИДА

Ўтган давр мобайнида пойтахтда давлат органлари ва фуқаролик жамияти институтларининг яқин ҳамкорлиги асосида жамоат тартибини сақлаш, ҳуқуқбузарликлар профилактикаси ва жиноятчиликка қарши курашининг сифат жиҳатидан янги тизимини жорий этиш, ҳуқуқ-тартиботни ва фуқаролар ҳуқуқлари, эркинликлари ва қонуний манфаатларини ишончли ҳимоя қилишни таъминлаш бўйича салмоқли ишлар амалга оширилди.

Шу билан бирга, хизматни ўташни ташкил этиш амалиётини ўрганиш сүтканинг кечки ва тунги вақтида ҳуқуқни муҳофаза қилувчи органларнинг мавжуд куч ва воситаларини тақсимлашнинг етарли даражада самарали эмаслигини кўрсатди ҳамда бу пойтахтда қриминоген вазиятга тезкор таъсир кўрсатиш, уни назорат қилиш ва баҳо бериш имконини бермаётди. Ушбу вақтда ҳуқуқбузарликлар умумий сонининг яримдан кўпи, айниқса, оғир ва ўта оғир жиноятларнинг содир этилаётганлиги ҳам бундан далолат беради.

Тошкент шаҳрида ҳуқуқни муҳофаза қилувчи органлар фаолиятининг самарадорлигини ошириш, сүтканинг кечки ва тунги вақтида жамоат тартибини таъминлаш, ҳуқуқбузарликлар профилактикаси ва жиноятчиликка қарши курашиш борасида уларнинг яқин ҳамкорлигини ташкил этиш мақсадида:

1. Ўзбекистон Республикаси Бош прокуратураси, Ички ишлар вазирлиги, Миллий гвардияси, Олий суди, Ўзбекистон ёшлар иттифоқи ҳамда Фуқароларнинг ўзини ўзи бошқариш органлари фаолиятини мувофиқлаштириш бўйича республика кенгашининг 2018 йил 1 июлдан Тошкент шаҳрида жамоат тартибини таъминлаш, ҳуқуқбузарликлар профилактикаси ва жиноятчиликка қарши курашиш тизимига қўйидагиларни назарда тутадиган **“Хавфсиз пойтахт” концепцияси**ни (кейинги ўринларда Концепция деб юритилади) эксперимент тарихасида жорий этиш тўғрисидаги таклифи маъқуллансин:

соат 16:00 дан 8:00 га қадар вақт оралиғида ички ишлар органлари, Миллий гвардия саф бўлинмалари жамоат тартибини таъминлаш кучларининг камиди 70 фоизини, шунингдек, жамоатчилик вакилларини (кейинги ўринларда — жамоат тартибини таъминлаш кучлари) жалб қилиш орқали куну тун уч сменаги патруль режимини ташкил этиш;

ички ишлар ва прокуратура органларининг профилактика, тезкор ва тергов бўлинмалари, маъмурий судлар, адвокатура, шунингдек, суд-тиббий экспертиза хизматлари ходимлари томонидан сүтканинг кечки ва тунги вақтида хизмат фаолиятини тўлиқ амалга ошириш, кейинчалик сүтканинг кундузги вақтида ўн олти соат давомида уларни бевосита хизмат вазибаларини бажаришдан озод этиш;

ҳуқуқбузарликларнинг ўз вақтида олдини олиш ва уларга чек қўйиш мақсадида ички ишлар органлари бўлинмалари, биринчи навбатда, жамоат тартибини таъминлаш кучларининг патруль гуруҳлари ходиса содир бўлган ёки сигнал берилган жойга максимал тезкорлик билан етиб боришини таъминлаш.

2. Белгилаб қўйилсинки:

патруллик қилиш учун бириктирилган ҳудудда жамоат тартибини бузиш ҳолатлари мавжуд эмаслиги, уларнинг ўз вақтида олди олиниши ва уларга чек қўйилиши сүтканинг кечки ва тунги вақтида хизмат олиб бораётган жамоат тартибини таъминлаш кучлари фаолиятини баҳолашнинг энг муҳим меzonлари ҳисобланади;

сүтканинг кечки ва тунги вақтидаги фаолият жамоат тартибини таъминлаш кучларининг ва жалб этилган давлат органлари бўлинмалари шахсий таркибининг яқин ҳамкорлигида ташкил этилади;


жамоат тартибини таъминлаш кучлари томонидан сүтканинг кечки ва тунги вақтида автомобилларда патруллик қилиш аралаш тартибда, яъни ҳам автомобилларда, ҳам пйёда амалга оширилади;

(Давоми 2-бетда).



«Ўзбекистон — кенг кўламли ислохотлар мамлакати»

Хитойдаги машҳур “Psearcher” журналининг махсус сони ана шундай номда чоп этилди.



Журналнинг сержило саҳифаларида Ўзбекистоннинг ижтимоий-сиёсий, иқтисодий ҳаётидаги кенг қамровли ислохотлар ҳақида сўз юритилади. Шунингдек, қонун устуворлигини таъминлаш, давлатнинг демок-

ратик асосларини мустаҳкамлаш борасида эришилаётган ютуқларга ҳам юқори баҳо берилган.

Материалларда Ўзбекистоннинг сармоявий салоҳияти, бизнесга ҳалақит бераётган маъмурий тўсиқларга босқичма-босқич барҳам бериш, тадбиркорларга кредитлар ажратишнинг содда-лаштирилган жараёнлари ҳақида батафсил маълумотлар келтирилган. Ўзбекистон Республикаси Президенти ҳузуридаги Тадбиркорлик субъектларининг ҳуқуқлари ва қонуний манфаатларини ҳимоя қилиш бўйича вакили институти фаолияти тўғрисидаги янгилик ҳам журналлар эътиборини тортиши, шубҳасиз.

(Давоми 2-бетда).



ЖАМИЯТНИНГ ИШОНЧИ ВА ТАЯНЧИ



“Ижтимоий фикр” жамоатчилик фикрини ўрганиш маркази томонидан ўтказилган “Ота-оналар ва болалар, ўсмирлар ва болалар тарбияси” мавзuidaги сўровнома ҳам мазкур жараён фаол давом этаётганини кўрсатмоқда. Вояга етаётган авлодни тарбиялаш, болалар ҳамда ёшларни ижтимоий муҳофаза қилишнинг муҳим омилли сифатида оила институтини мустаҳкамлаш бўйича Ўзбекистонда руй бераётган кенг миқёсдаги ўзгаришлар даврида ушбу мавзу янада долзарб аҳамиятга эгадир.

Айтиш жоизки, ижтимоий сўров ўзбек жамиятида оила ва фарзандлар энг муҳим қадрият бўлиб қолаётганини тасдиқлади. Респондентларнинг 67,5 фоизи бола тарбияси ҳамда уни камолга етказиш учун, аввало, оила масъул, фарзандлар тарбияси

ота-онанинг энг муҳим бурчи, деб ҳисоблайдилар.

Хар уч кишидан бири “Бу жавобгарлик ота-оналар ва давлат, тегишли таълим муассасалари ўртасида тақсимланиши керак”, деган мулоҳазани билдирган. Сўралганларнинг фикрича, давлатнинг ўрни таълимнинг барча босқичида бола ҳуқуқини рўёбга чиқариш механизмларини таъминлаш, оила институтининг самарали ишлаши учун жамиятда қулай ижтимоий-маданий муҳитни шакллантиришга ёрдам берувчи шароитлар яратишда намоён бўлиши лозим.

Сўровномада қатнашганлар айнан ота-она меҳри ҳамда тарбияси боланинг жисмоний ва интеллектуал ривожланишини, унинг руҳий хотиржамлигини таъминлайди, тинч оилавий муҳит эса фарзандларнинг қобилияти

ҳамда истеъдодини аниқлаш, келажақда уларни юзага чиқариш имконини беради, деган фикр-дадилрлар. Улар бола тарбиясидан кўзланган асосий мақсад эртамиз эгаларини ҳалол, меҳнатсевар, жамиятнинг фаол аъзоси, Ватаннинг фидойи ҳимоячилари, ота-она таянчи қилиб камол топтиришда, деб биладилар.

Таълим тизимидagi ўзгаришлар кўллаб- қувватланмоқда

Шуниси диққатга сазоворки, ватандошларимиз фарзандларига яхши таълим беришга ва бу ишни боланинг ёшлигидан бош-

лашга интиладилар. Респондентларнинг аксарияти мактабгача таълим соҳасини тўдан ислоҳ этиш борасида амалга оширилаётган чора-тадбирлар давр талаби эканини кўрсатиб ўтишди. Уларнинг нуктаи назарига кўра, Президентимизнинг “Мактабгача таълим тизими бошқарувини тўдан такомиллаштириш чора-тадбирлари тўғрисида”ги Фармони ҳамда “Мактабгача таълим тизимини тўдан такомиллаштириш чора-тадбирлари тўғрисида”ги ва “Ўзбекистон Республикаси Мактабгача таълим вазирлиги фаолиятини ташкил этиш тўғрисида”ги қарорлари муҳим аҳамиятга эга. Бинобарин, айнан мактабгача таълим ўсиб келаётган авлоднинг келгусида жамиятга фаол қўшилиб кетишига пойдевор яратлади.

(Давоми 3-бетда).



Бахтиёр АҚРАМОВ ва Ҳасан ПАЙДОЕВ олган суратлар.

Медиация низоларни ҳал этишга кўмаклашади

Олий Мажлис Сенатининг Қонунчилик ва суд-ҳуқуқ масалалари қўмитаси ишчи гуруҳининг йиғилиши бўлиб ўтди. Унда “Медиация тўғрисида”ги Ўзбекистон Республикаси Қонуни дастлабки тарзда қўриб чиқилди.

ПАРЛАМЕНТДАГИ МУХБИРИМИЗ ХАБАР ҚИЛАДИ

Янги Қонун Олий Мажлис Қонунчилик палатаси томонидан 2018 йил 12 июнь кунин қабул қилинган ҳамда Сенатга юборилган. Ишчи гуруҳ Олий

суд, Бош прокуратура, Адлия, Молия вазирликлари, Хотин-қизлар қўмитаси, Савдо-саноат палатаси, Ўзбекистон Республикаси Президенти

ҳузуридаги Давлат бошқаруви академияси, “Маҳалла” хайрия жамоат фонди ва бошқа манфаатдор идора ҳамда илмий доиралар

вакилларидан таркиб топган. Йиғилишда қайд этилганидек, Қонуннинг мақсади Ўзбекистон Республикасида низо-ларни тартибга солишнинг муқобил усулларини ривожлантириш учун ҳуқуқий шарт-шароитлар яратиш, мамлакатнинг суд тизимига тушадиган босимни камайтиришдан иборат.

(Давоми 3-бетда).



ҲАЁТ ДАВОМИДА КЎРИШ КЕРАК БЎЛГАН ШАҲАР

Хоразм — қадимги Буюк Ипак йўлининг марказида жойлашган бўлиб, Ўзбекистоннинг энг юқори сайёҳлик салоҳиятига эга минтақаларидан бири ҳисобланади. Хиванинг халқаро миқёсда “Очик осмон остидаги музей шаҳар” дея эътироф этилиши ва ЮНЕСКОнинг Бутунжаҳон маданий мероси рўйхатида киритилиши нафақат Хоразм вилояти, балки мамлакатимизнинг жаҳон туризм бозоридан муносиб ўрин эгаллашида мустаҳкам замин яратди.



Президентимиз Шавкат Мирзиёев ўтган йилнинг 27-28 январь ҳамда 14-15 октябрь кунлари Хоразм вилоятига ташрифи чоғида Хивадаги Ичан қалъа ҳамда Нуриллабой саройи мажмуаларида, “Фаровон” меҳмонхонасининг қурилиш участкасида амалга оширилаётган бунёдкорлик ишлари, тарихий обидаларни реконструкция

қилиш лойиҳалари билан танишиб, қадимий Хиванинг сайёҳлик жозибадорлигини янада ошириш мақсадида сайилгоҳ кўчалар ташкил этиш, замонавий инфратузилмани шакллантириш бўйича топшириқлар берган эди. Давлатимиз раҳбарининг 2017 йил 4 майдаги “2017 — 2021 йилларда Хоразм вилояти ва Хива шаҳрининг

туризм салоҳиятини комплекс ривожлантириш Дастури тўғрисида”ги қарори бу борадаги ишлар самарадорлигини оширишда муҳим омил бўлди.

Ушбу Дастур ижроси доирасида бугунги кунда ҳудудда кенг кўламли ишлар олиб борилмоқда.

4 ➡

МУНОСАБАТ

Президентимиз Шавкат Мирзиёев халқимизнинг миллий-диний қадриятларини тиклаш, маърифий исломни ривожлантириш, буюк аجدодларимизнинг динимиз софлигини таъминлашга қўшган улкан ҳиссасини кенг ўрганиш ва тарғиб этиш юзасидан қўллаб ташаббусларни бошлаб берди.

«ЁШЛАРИМИЗНИ МИЛЛИЙ ВА УМУМИНСОНИЙ ҚАДРИЯТЛАР РУҲИДА ТАРБИЯЛАШ

барқарор тараққиётга
эришишнинг энг муҳим шарти»

Давлатимиз раҳбари Рамазон ҳайити кунин Ислом цивилизацияси маркази қурилиш майдонига ташриф буюриб, иншоот пойдеворига тамал тоши қўйгани бу борада яна бир муҳим қадам бўлди.

ЎЗА ва “Халқ сўзи” мухбирлари дин арбоблари, зиёлилар, маънавий ва маърифат соҳаси, ёшлар вакилларининг марказ ҳақидаги фикрлари билан қизиқди.

Усмонхон АЛИМОВ,
Ўзбекистон мусулмонлари идораси раиси,
муфтий:

— Бисмиллаҳир Раҳмонир Раҳим. Президентимиз ташаббуси билан халқимизнинг эртанги кунин, фаровон келажагини кўлаб барча соҳада улкан ўзгаришлар қилинати. Бу ислохотларни бутун халқимиз қўллаб-қувватлапти.

Президентимиз ўтган йили 1 сентябрь — Қурбон ҳайити кунин Хазрати Имом мажмуасига келиб, Ислом цивилизацияси марказининг қурилиши, мақсад ва вазибалари юзасидан кўрсатмалар берган эди. Шундан сўнг мазкур мажмуа ёнидан ўн гектарга яқин ер ажратилиб, ишлар жадал бошланди.

Давлатимиз раҳбари шундай улуг айём кунин марказ қурилишининг бошланаётгани замирида эзгуният, чуқур маъно-мазмун муҳассам эканини таъкидлади. Бу марказни қуришдан мақсад ислом маърифатини ўрганиш, буюк аждодларимизнинг бой меросини халқимизга, дунё ҳам-жамиятига етказиш, жаҳолатга қарши маърифат билан курашиш эканини қайд этиди.

Дарҳақиқат, динимизнинг гуллаб-яшнаши, ислом

тамаддуни юксак даражага кўтарилишида аждодларимизнинг ҳиссаси беқиёс. Юртимиздан етишиб чиққан Имом Бухорий, Имом Термизий, Бурҳониддин Марғиноний, Абу Ҳафз Кабир каби улуг алломалар исломнинг асл моҳиятини бутун дунёга ёйган. Бундай улуг дунёга ёйган, қадам-жолари диёримизнинг деярли барча гўшасида мавжуд бўлиб, юртимизга келаётган меҳмонлар ҳам-масини зиёрат қилишининг имкони йўқ. Ислом цивилизацияси марказида аждодларимиз мероси, таълимотлари ҳақида батафсил маълумот олиш мумкин бўлади. Ушбу марказнинг асосий гоёси улуг алломаларимизнинг ислом ривожига улкан ҳиссасини тарғиб этиш, тарихимиз, маънавий меросимизга дунё эътиборини қаратишдан иборат. Президентимиз таъкидлаганидек, бу йўлдаги барча сайёҳаракатларимиз ёшлар таълим-тарбиясига, халқимиз тинчлик-осойишталиги ва ёрۇқ келажагига замин яратди.

(Давоми 2-бетда).



ҲАЁТ ДАВОМИДА КЎРИШ КЕРАК БЎЛГАН ШАҲАР

(Давоми. Бошланиши 1-бетда).

Сайёҳга нима қизиқ?

“Шарқ гавҳари” дея таъриф бериладиган қадимий ҳамда навқирон Хивани томоша қилиш учун Хоразмга ташриф буюрсангиз, сайёҳтингизни, албатта, “Ичан қалъа”дан бошлайсиз. Бу кўҳна шаҳарнинг шарқона руҳини ҳис этиш учун унинг бозорларини, миллий унаромандчилик сабоқлари ўтказиладиган махсус мактабларияро тор қўчалари бўйлаб сайр қилишингиз мумкин. Айниқса, новб осориатқаларга бой Хива музейлари жаҳон сайёҳларини ҳайратга солаётгани ҳам ҳақиқат.

Хива музейи фондида 39 мингга яқин экспонатлар сақланмоқда. Уни бир бор кўриш учун дунёнинг турли бурчақларидан келатган сайёҳлар оқими йилнинг тўрт фаслида ҳам тўхтамайди. Жорий йилнинг ўтган 5 ойи давомида бу шаҳарга 515 минг 800 нафар, жумладан, 32 минг нафар чет эллик сайёҳ ташриф буюргани фикримиз тасдиғидир. Хизмат кўрсатиш сифатининг яхшиланиши, турли маданий томошаларнинг уюштирилиши натижасида хорижий сайёҳларнинг вилоятда қолиш давомийлиги 2012 йилда ўртача 1,1 суткани ташкил этган бўлса, жорий йилда 2 суткага етди. Бу эса янги иш ўринлари яратилиб, кўшимча валюта тушуми пайдо бўлди, савдо ва хизматлар ҳажми ҳам ортди, деганидир.

Мутахассисларнинг таҳлилларига кўра, Хоразм вилояти туристик экскурсия ресурсларининг зичлиги ҳамда улар таркибидagi тарихий-меъморий объектлар кўрсаткичи бўйича мамлакатимизда биринчи ўринда туради. Хоразмда неолит давридан то XIX асргача бўлган даврни қамраб олган 254 та маданий мерос ёдгорлиги бўлиб, уларнинг 18 таси археология, 132 таси меъморчилик, 66 таси ҳайкалтарошлик, 6 таси диққатга сазовор жойлар ва 32 таси муқаддас қадимжолардир. Уларда мамлакатимизнинг турли ҳудудларидан келган муҳир усталар реставрация ҳамда таъмирлаш ишларини олиб борапти.

Вазирлар Маҳкамасининг 2017 йил 19 майда қабул қилинган “Хоразм вилотидаги “Нуриллабой” тарихий мажмуасини реконструкция ва реставрация қилиш тўғрисида”ги қарори асосида ушбу масканда ҳам кенг қўламли таъмирлаш ишлари олиб борилади. Натижада бадийи галерея, амфитеатр, қабуллар уйи, унаромандлар маркази, миллий услубдаги овқатланиш шохобчаларини ўз ичига олган ажойиб сайёҳлик мажмуаси бунёд этилди.

— Хоразм вилотида ҳамда Хива шаҳрининг сайёҳлик салоҳиятини кенг тарғиб қилиш, хорижий туристик компаниялар билан ҳамкорликни йўлга қўйиш мақсадида халқаро ярмаркаларда фаол иштирок этилмоқда, — дейди вилоят ҳокимининг туризм масалалари бўйича ўринбосари Темур Давлетов. — Жорий йилда Мадрид шаҳрида бўлиб ўтган Fitur 2018, Берлин шаҳридаги ITB халқаро туристик ярмаркаларида катнашиб, бир қатор келишувларга эришдик. АКШнинг Smithsonian Institution институти, Испания Қироллиги энергетика ва туризм вазирлигининг туризм соҳаси экспертлари, Россия, Австрия, Хиндистон, Қирғизистон оммавий ахборот воситалари вакиллари вилоятнинг туризм имкониятлари билан танишиш мақсадида ташриф буюрдилар.

Сайёҳлар эътиборини нафақат тарихий ёдгорликлар, балки замонавий ажойиботлар орқали жалб қилиш тадбирлари ҳам кўрилмоқда. Яқинда Швейцария ҳамда Ўзбекистонлик аэроостатчилар Хива осмони узра илк бор ҳаво шарида парвозни амалга оширишди. Ҳаво шарида туриб “Ичан қалъа” давлат музей-қўриқхонасини 100 метр балангликдан кузатиш, шаҳарнинг бетакрор гўзаллигидан баҳраманд бўлиш ва уни фотосуратларга муҳрлаш меҳмонларга чексиз завқ улашди.

Меҳмонхона меҳмонга ёқсин

Халқаро тажрибадан маълумки, сайёҳларга намунали хизмат кўрсатишда меҳмонхона ҳўжалиги муҳим ўрин тутади. Вилоятда туризмни ривожлантириш бўйича ишлаб чиқилган чора-тадбирлар дастурида ихчам меҳмонхоналар ва меҳмон уйлари тизимини ривожлантириш

кўзда тутилган. 2014 йилда вилоятда атиги 39 та меҳмонхона фаолият юритган бўлса, бугунги кунга келиб уларнинг сони 60 тага етди. Ўтган йили вилоятда 8 та янги меҳмонхона фойдаланишга топширилди. Юқорида таъкидланган қарорга асосан ишлаб чиқилган “Йўл харитаси”га кўра, жорий йил якунигача вилоятда яна 10 та меҳмонхона барпо этилади.

Урганч шаҳрида яқинда иш бошлаган “Караван” меҳмонхонаси ўзига хос меъморий ечимни, сайёҳлар учун яратилган кўшимча қўлайликлари билан ажралиб туради.

— Миллий ҳамда жаҳон меъморчилиги анъаналари уйғунлашган меҳмонхона биноси қурилиши учун 7,5 миллиард сўм йўналтирилди, — дейди тадбиркор Отабек Ҳожиёв. — Меҳмонхонада бир вақтнинг ўзида 50 нафар мижозга аъло даражада хизмат кўрсатиш учун барча шароит яратилган. Мазкур кўркам иншоот фойдаланишга топширилган, 30 нафар ёш доимий иш ўрнига эга бўлди. Янги бино яратилган кўшимча қўлайликлар ва юқори сифатли жиҳозлар билан Туризмни ривожлантириш давлат кўмитаси қошидаги Туризм хизматларини сертификатлаш маркази томонидан тўрт юлдузли меҳмонхоналарга қўйиладиган талабларга тўла жавоб беради.

Этиборли жиҳати, вилоятда чет эл инвестициясини жалб қилган ҳолда ташкил қилинган меҳмонхоналар сони кўпаймоқда. Жумладан, янги барпо этилаётган “Фаровон” меҳмонхонасига ҳам франциялик ишбилармонлар сармояси киритилади.

Хивага тезюрар поезд келади

Худудларнинг туристик салоҳиятидан самарали фойдаланиш сайёҳларга транспорт хизмати кўрсатишни яхшилашни талаб қилади. Марказий Осиё мамлакатлари орасида фақат Ўзбекистонда юқори тезликда ҳаракатланувчи поездлар Буюк Ипак йўли бўйидаги бетакрор маданий меросга эга шаҳарларни бир-бири билан боғлайди. Дастлабки темир йўл излари ётқизилгунга қадар Тошкентдан Самарқандгача тўялар карвониди бир неча кун йўл юрилган бўлса, ҳозир замонавий тезюрар поезд бу масофани атиги икки соат ичида босиб ўтади. Пойтахтдан Бухорога етиб олиш учун эса 3,5 соат қиёфа. Келгусида Хивага ҳам юқори тезликда ҳаракатланувчи замонавий поездлар қатнови йўлга қўйилади. Президентимиз ташаббуси билан Урганчдан Хивагача 31,7 километр узунликдаги темир йўл қурилиши, миллий услубдаги замонавий вокзал барпо этилиши Хива шаҳрини халқаро туризм марказларидан бирига айлантиришга хизмат қилади.

Урганч халқаро аэропорти ҳам қайта таъмирланиб, сайёҳларга замон талаблари асосида хизмат кўрсатиш имкониятлари яратилди. Ўтган йилнинг апрель ойидан бошлаб Париж — Урганч, Милан — Урганч, жорий йилнинг март ойидан бошлаб эса Урганч — Рим йўналишлари бўйича авиарейсларнинг йўлга қўйилиши хорижий сайёҳлар оқими кўпайишида муҳим аҳамият касб этмоқда. Яна бир янгиллик шуки, “Ўзбекистон темир йўллари” акциядорлик жамияти томонидан туризм гуруҳларидаги сайёҳлар сони 10 нафардан 24 нафаргача бўлган ҳолда, 10 фоиз ҳамда 25 нафар ва ундан ортиқ бўлса, 15 фоизлик чегирмалар берилмоқда. Байрам кунларида эса 50 фоиз чегирмалар қўлланилади. Ўтган йилнинг июнь ойидан “Ўзбекистон ҳаво йўллари” Миллий авиакомпанияси ҳам Тошкент — Урганч — Тошкент йўналиши бўйича сайёҳлар сони 10 кишидан кам бўлмаган туристик гуруҳлар учун авиачипталар нархига 5,8 фоизлик чегирмалар бермоқда.

Клавихонинг авлодлари Хоразмга ошиқшмоқда

Жорий йил бошида Испания пойтахти Мадрид шаҳрида 38-Халқаро туризм кўргазмаси ўтказилди. Микёси жиҳатидан Берлин кўргазмасидан кейин иккинчи ўринда турувчи ушбу халқаро тадбир ҳар йили Испания ҳукумати ва Мадрид шаҳрида жойлашган Бутунжаҳон туризм ташкилоти ҳамкорлигида ташкил қилинади. Fitur кўргазмаси деб ном ол-

Жорий йилнинг ўтган 5 ойи давомида ХИВАга

515 800

нафар сайёҳ ташриф буюрди.

ган мазкур анжуманда дунёнинг 166 та давлатидан 10000 дан ортиқ компаниялар ҳамда сайёҳлик агентликлари иштирок этгани унинг жаҳон туризми соҳасидаги аҳамияти нечоғли катта эканини кўрсатади.

Тадбирда мамлакатимиз делегацияси ҳам муваффақиятли катнашиб, юртимиз сайёҳлик салоҳиятини намойиш қилди. Ташрифнинг муҳим воқеаларидан бири Хоразм вилотидаги Хива ва




Испаниянинг Авила шаҳарлари ўртасида биродарлашган шаҳарлар тўғрисидаги келишувни имзолаш учун музокаралар жараёнининг бошланиши бўлди. — Хива ва Авила шаҳарлари ўртасида жуда кўп ўхшашликлар бор, — дейди Хива шаҳри ҳокими Эркин Якубов. — Ҳар иккала шаҳар қалъа шаклида бўлиб, деворлар Хивада паҳсадан, Авилада эса тошдан кўтарилган. Шаҳар-қалъага кириш учун Хивада 4 та дарвоза ўрнатилган бўлса, Авилада улар 6 та. Ҳар икки шаҳарда ҳам қалъа ичкарисида ҳозирги кунда ҳам аҳоли яшайди. Авила 1985 йилда, Хива эса 1989 йилда ЮНЕСКОнинг Бутунжаҳон маданий мероси рўйхатига киритилган.

“Улли ҳовли”нинг иккинчи умри

Хоразм вилотининг Урганч туманидаги Фойбу қишлоғида “Улли ҳовли” деб аталувчи мажмуа бор. Лойдан тикланган, қарийб 100 та хонадан иборат ушбу кўрғон яқин йилларгача қаровсиз ётар, ҳовлининг ичкарасиё ташқариси юлғунзорга айланганди. Ушбу ҳудуддаги собиқ ширкат ҳўжалигига узоқ йиллар раислик қилган Давлатназар Ражабов нафақага чиққан, ота-боболарининг ақлу зақоси, меҳнати билан бунёд бўлган мазкур маскани ободонлаштиришга бел боғлади. Бу йўлда кўп қийинчиликларга, сансалорликларга дуч келди, бироқ азмида қатъий турди.

Мамлакатимизда туризм соҳасини ривожлантириш борасида кенг қўламли ислохотларнинг бошланиши,



2017 — 2021 йилларда Хоразм вилоти ва Хива шаҳрининг туризм салоҳиятини комплекс ривожлантириш Дастурининг қабул қилиниши отахоннинг кўп йиллик орзулари рўёбига йўл очди. Давлатназар оға байрат-шижоат билан ишга киришди. Қадимий кўрғон қисқа муддатда реставрация қилиниб, бу ерда унаромандчилик маркази, ресторан, меҳмонхона, кинозал ҳамда фотогалерея ташкил этилди. Махсус отхона қурилиб, сайёҳлар томоша қилиш учун машҳур ахалтақа зотли отлар келтирилди.

— Бутун умрим далада, деҳқончилик билан ўтди, — дейди Давлатназар оға. — Гапнинг очиги, қишлоқда даромад ердан чиқади деб ўйлаб, фақат деҳқончилик билан шуғулланиб юрaverибмиз. Аслида, худудимизда ундан ўн ҳисса сердаро-

тетиклашяпти, дунёқарашимиз ўзгармоқда.

Дарҳақиқат, инсон ҳаётида сайёҳат қилиш алоҳида ўринга эга. Негаки, сайёҳатда, биринчи навбатда, сиз учун янгиллик бўлган ўзгача муҳитни, табиат муъжизалари, инсон ақлу заковати билан бунёд этилган қадимий ҳамда замонавий иншоотларни кўрасиз. Хорижликлар меҳнат таълиғига чиққан, албатта, бирор манзилга сайёҳатга отланади. Биз эса бунга кўп ҳам ҳафса қилавермаймиз. Хорижий давлатларга боришни кўя туринг, Хоразмда яшаб, ҳатто, умрида бир бор Хивани бориб кўрмаган юртдошларимиз бор.

Шу маънода, Президентимизнинг жорий йил 7 февралдаги “Ички туризмни жадал ривожлантиришни таъминлаш чора-тадбирлари тўғрисида”ги қарори халқимиз маданий ҳаётида янги саҳифа очди. Мазкур ҳужжатда қасаба уюшмалари зиммасига ҳам талай вазифалар юклатилган.

✓ 2014 йилда Хоразм вилотида атиги 39 та меҳмонхона фаолият кўрсатган бўлса, бугунги кунга келиб уларнинг сони 60 тага етган.

✓ Буюк Британиянинг “The Telegraph” нашри томонидан эълон қилинган “Ҳар бир инсон ҳаёти давомида кўриши керак бўлган 35 шаҳар” рўйхатидан Хива ҳам ўрин олган.

✓ Жаҳон туризми экспертлари Ўзбекистонни яқин келажақда сайёҳлар оқими янада ортиши кутилаётган 5 давлат қаторига қўшди.

мад соҳаларни ривожлантириш имкони бор экан-у, оёғимиз остидаги хазинани англамабмиз. Иқтисодиётни жадал ривожлантиришда туризм қанчалик муҳим аҳамият касб этишини бугун фаолиятимиз мисолида аққол кўриб турибмиз.

“Минг бор эшитгандан кўра...”

Наврўз байрами арафасида маҳаллаамиз оқсоқоли кўнғирок қилиб маҳалладошлар билан юртимизнинг қадимий шаҳарлари бўйлаб сайёҳатга боришни таклиф қилди. Байрам муносабати билан кўшимча таътил кўнлари берилгани боис таклифга бажонидил рози бўлдик. Қирқ нафар сайёҳ замонавий автобусда йўлга чиқдик.

— Бундан ярим аср муқаддам институтида ўқиб юрган давримизда курсдошлар билан Хива, Бухоро, Самарқанд шаҳарларига қилган сайёҳатимиздан эсдалик бўлган фотоальбомни varaқлаб, сафар таассуротларини ажиб бир завқ ва соғинч билан эслайман, — дейди ҳамроҳим Баҳодир Нуруллаев. — Шундан кейин иш, рўзгор ташвишлари билан бўлиб бирон марта сайёҳатга чиқмабман. Бугун мана шундай хайрли ишларга бош бўлаётганларга раҳмат! Кексайган чоғимизда юртимизнинг гўзал масканларида бўлиб, табаррук қадам-жоларни зиёрат қилиб, руҳиятимиз

Соҳа истиқболи — депутатлар нигоҳида

Мамлакатимиз Президентининг 2017 йил 16 августда қабул қилинган “2018-2019 йилларда туризм соҳасини ривожлантириш бўйича биринчи навбатдаги чора-тадбирлар тўғрисида”ги қарори бу борадаги ишлар самарадорлигини оширишда муҳим омил бўлди. Яқинда халқ депутатлари Хоразм вилоти Кенгашининг ижтимоий-маданий ривожланиш масалалари бўйича доимий комиссияси навбатдаги ййилигида мазкур қарорнинг вилотидаги ижроси кенг муҳокама этилди. Унда вилоят сайёҳлик салоҳиятини кучайтириш борасида амалга оширилаётган ишлар юзасидан мутасадди раҳбарларнинг ахборотлари тингланди.

— Вилотимиз туризм соҳасида улкан салоҳиятга эга бўла туриб, узоқ йиллар

бу имкониятдан тўлиқ ва самарали фойдаланилмади, — дейди халқ депутатлари Хоразм вилоти Кенгашининг Ижтимоий-маданий ривожланиш масалалари бўйича доимий комиссияси раиси, вилоят Кенгаши депутати Раҳимберган Собуров. — Айни кунда вилотнинг туризм салоҳиятини янада ривожлантириш мақсадида ишлаб чиқилган “Йўл харитаси” асосида жадал юмушлар олиб боришмоқда. Аммо ютуқлар билан бир қаторда, камчиликлар, ўз ечимини кутаётган муаммолар ҳам талайгина. Хусусан, Хоразмнинг Жалопилдин Манғуберди, Нажмиддин Кубро, Тўмарис каби тарихий қаҳрамонлари ҳақида, қадимий воҳа маданияти ва маҳаллий аҳоли урф-одатлари хусусида бадийи, ҳўжжатли фильмлар, муслиқ клиплар яратиш ва дунё бўйлаб тарғиботини йўлга қўйиш ҳам сайёҳларнинг бу мафтункор ўлкага қизиқишини оширади. Ёки интернет тезлигининг пастлиги хусусида кўплаб эътирозлар билдирилади.

Худуднинг туризм салоҳиятини, тарихий-маданий хусусиятлари ва табиий-иклим шароитларини тарғиб қилишда турли халқаро кўргазма ҳамда ярмаркаларда иштирок этиш, хорижий давлатлар вакиллари таклиф қилган ҳолда, фестиваллар, спорт мусобақалари уюштириш ҳам муҳим аҳамият касб этади. Шу маънода, ҳар йили аънавий тарзда ўтказилаётган “Ковун сайли”, “Рақс сеҳри”, “Хоразм маданияти кўнлари” каби фестивалларга хорижий мамлакатлардан ташриф буюраётган қатнашчилар сони йилдан-йилга ортиб бораётгани кувонарлидир.

Бундан ташқари, вилоятда туризмнинг тарихий-меъморий йўналиши билан чегараланиб қолмасдан, “Қизилқум” давлат кўриқхонаси зонасида, Амударё соҳилларида, Говуқўл ва Эшонравот кўлларида экотуризмни, Богот, Хонқа, Ҳазорасп, Урганч туманларида шифобахш ер ости сувлари билан боғлиқ ҳолда, тиббий туризмни ривожлантириш имкониятларидан самарали фойдаланиш даркор.

Статистик маълумотларга кўра, 2017 йилда Хоразм вилотида дунёнинг 78 та мамлакатидан 60,6 минг хорижлик сайёҳ ташриф буюрган. Вилоят иқтисодиётида ялпи ҳудудий маҳсулотнинг ўртача 0,85 фоизи, экспортнинг 1,3 фоизи туризм ҳиссасига тўғри келади. Бугунги кунда жаҳон ялпи ички маҳсулотининг 9 фоизи, хизматлар экспортининг 30 фоизи айнан шу соҳада яратилаётганини ҳисобга олсак, вилотда сайёҳлик индустриясини ривожлантиришда фойдаланилмаётган имкониятлар жуда кўплиги аён бўлади. Шу боис туризмни ривожлантириш бўйича қабул қилинган ҳудудий дастурлар ижросини таъминлаш, бу борада мутасадди ташкилотлар маъсулиятини ошириш давр талабидир.

Жаҳон туризми экспертлари Ўзбекистонни яқин келажақда сайёҳлар оқими янада ортиши кутилаётган беш давлат қаторига қўшиб, мамлакатимизда кейинги 10 йил ичида туризм йилига 7 фоиздан ўсиб боришини баъорат қилишмоқда. Бу ҳам янги иш ўринлари очиш, экспорт ва ялпи ички маҳсулот ҳажмини ошириш, аҳоли турмуш даражасини янада юксалтириш имконини яратди.

Хоразмнинг сайёҳлик салоҳиятини юксалтириш борасида амалга оширилаётган лойиҳаларнинг бир қисмига тўхталдик, холос. Бу йўналишдаги янгилликлар, бунёдкорликлар кўлами эса ниҳоятда кенг. Аслида, “Минг бор эшитгандан кўра, бир бор кўрган афзал”, дейди доно халқимиз. Бу ўзгаришлар билан яқиндан танишиш учун Хоразмга бир келинг! Сизни қадим ва навқирон Хивада кутамиз!

Одилбек ОДАМБОВ,
“Халқ сўзи” мухбири.



Ҳасан ПАЙДОВ олган суратлар.

Халқ сўзи

Народное слово

МУАССИСЛАР:

Ўзбекистон Республикаси Олий Мажлиси Қонунчилик палатаси Кенгаши, Ўзбекистон Республикаси Олий Мажлиси Сенати Кенгаши ва Ўзбекистон Республикаси Вазирлар Маҳкамаси

Бош муҳаррир Ўткир РАҲМАТОВ

2008 йил 15 январда Ўзбекистон Матбуот ва ахборот агентлигида 0001-рақам билан рўйхатга олинган. Нашр индекси — 229. Буюртма Г — 645. 115 730 нусхада босилди, ҳажми — 2 табоқ. Офсет усулида босилган. Қоғоз бичими А—2. Баҳоси келишилган нархда.

Газетамиз ҳақидаги маълумотларни юқлаб олиш учун QR-коднинг телефонингиз орқали сканер қилинг.



ТЕЛЕФОНЛАР:

Девонахона (0-371) 233-52-55;
Котибият (0-371) 233-10-28; Эълонлар (0-371) 232-11-15.



Таҳририятга келган кўлаёмалар тақрир қилинмайди ва муаллифга қайтарилмайди.

Газетанинг сўзлаб берилиши учун обунани расмийлаштирган ташкилот жаавобгар.

Газета таҳририят компьютер марказида термал ҳамда оператор Ж. Тоғева томонидан саҳифаланди.

Газетанинг полиграфик жиҳатдан сифатли чоп этилишига “Шарқ” нашриёт-матбаа акциядорлик компанияси масъул. Босмахона телефони: (0-371) 233-11-07.

«Шарқ» нашриёт-матбаа акциядорлик компанияси босмахонаси. Корхона манзили: «Буюк Турон» кўчаси, 41. ЎЗА якуни — 23.30 Топширилди — 01.15 1 2 3 4 5 6

• МАНЗИЛИМИЗ:

100000,

Тошкент шаҳри,

Матбуотчилик кўчаси, 32-уй.

Навбатчи муҳаррир — З. Ашурова.

Навбатчи — Д. Содиқов.

Мусаҳҳих — Ш. Машраббоев.